


+



皇明開國功臣錄卷二十六

定遠黃金

劉益 袁天祿 歐祥 王溥 吳宏 彭時中

孫杰 何真 張良佐 陶文興 潘敬 王德

李敬 趙祥 何世隆 袁政 秦彥諒 朱寶

翁子奇 胡汝 王雄 周賢 鄭彥

王忽雷 陶成 謝三 楊義 陳恭 黃榮

韓春 胡淵

劉益 礪山人仕元為遼陽行省平章洪武四年春二月益以遼東州郡地圖并籍其軍馬錢糧之數遣右

丞董遵僉院揚賢奉表來降其辭曰聖明啓祚實千載之遭逢遐邇傾心豈一夫之抗越迺改途而易轍願效順以投誠伏念臣叨守邊疆忝分戎閫天運既去人力難為國破家亡顧孤忠之何託勢窮力屈惟有德之是歸茲蓋伏遇

皇帝陛下道合乾坤量包宇宙陽春弘被於幽谷大明下燭於覆盆詔諭下頒恩威旁達臣等既荷濛濛無任歡欣謹遣右丞某等航海以朝天望風而投款休兵待命希洞照於愚衷賣劍買牛乞放歸於田里

上覽表嘉其誠遣斷事官吳立持詔往置遼東衛指揮

使司於得利羸城以益為指揮同知詔曰曩因元政不綱羣雄角逐朕起布衣提三尺劍命我中國英靈削平僭亂撫恤黔黎逾二十年天下已定中原無兵革之虞間者命將出師東征西伐摧強撫順惟欲溥海內外咸底治安於是識時務者率衆來歸共成大業前遼陽行省平章劉益能察審時幾推誠臣以遼東州郡地圖遣右丞董遵等奉表朝獻朕甚嘉焉雖漢竇融何專前美今特置遼東衛指揮使司授爾益同知指揮事爾其恪遵朕意固保遼民以屏衛疆圉則爾亦有無窮之譽益承詔泣官圖竭報效未幾

故元平章洪澤保馬彥翬共謀殺益其右丞張良佐左丞房嵩率部下擒彥翬殺之保保走納哈出營遼東之衆因推良佐等權衛事六月良佐等遣叅政張華行樞密院副使焦偶廉訪司僉事李茂等械送殺益逆黨平章八丹知院僧兒等至京以其事聞乃上其事於中書省曰忘身徇國為忠自有公論復讎討賊為義夫豈私情故指揮同知劉益總持戎旅鎮撫遼東知天命之有歸遂全師而款附寵承明詔賜以印章錫賚有加感懷無極蒙設遼東衛治俾之仍與鎮兵方盡小心遽因惟凶禍賴多士之協心執渠魁而就戮今將擒到逆黨八丹等送京師右丞相汪廣洋

以聞

上怒寘八丹等于法會遼東衛以元將納哈出擾邊來奏上遂置定遼都衛以馬雲為指揮使總轄諸衛軍馬鎮禦邊疆因遣雲諭祭于益曰爾昔居遼陽控制一隅能順天道達事幾奉圖獻地幡然來歸朕嘉爾誠俾佐武衛安集海邦方資懷來未附何失防閑遽殞厥身邊城之中失此良將朕甚悲愴茲特遣人諭祭且令有司護爾之柩歸葬碭山爾其有知歆此至意

袁天祿位元為福建行省叅政守福寧州至正戊戌
太祖親帥師取婺州己亥三月方國珍以溫紹慶元三
郡獻十一月胡大海又攻下處州七邑天祿見王師
無敵知天命有在遂以庚子正月遣古田縣尹林文
廣來納款以州降

上嘉勞之賜書褒譽夫元季之亂羣雄割據以昧于理
勢妄自尊大而取禍敗者踵相接當天祿請降兵雖
臨越然未入閩自昧者視之猶可高枕肆志天祿乃
能明炳幾先歸于有德以自全初不俟計窮勢蹙而
始屈烏乎俊傑固如是哉

歐祥一名普祥初事天完帝徐壽輝為將至正壬辰
祥陷袁州壽輝以祥統兵守禦其地庚子五月陳友
諒弒壽輝僭稱帝祥屬焉然耻友諒所為不樂為用
辛丑八月

太祖帥師討友諒拔江州為都友諒挈妻子奔武昌既
而友諒守南昌特胡廷珙見江州已破遣使詣軍中
請降祥以王師威震豪俊傾心潛識天命有在亦遣
使以其地降壬寅正月車駕至南昌祥率衆來見
上嘉其誠封袁國公俾仍守舊鎮加兵權預征討尋遣
率師取撫州等郡又從克平武昌甲辰三月

上遣使以書諭祥及江西守將鄧愈曰贛州熊天瑞壬寅年納款投降請受賞賜不期背違初言輕擾地方理宜聲討安靖人民今命袁國公將劉右丞黃參政陶叅政小劉僉院永新周同僉等軍馬盡數調遣委自平章歐文廣親行統領會合龍泉平章彭時中廣信元帥葛俊等各部軍齊足悉聽總兵官鄧愈節制攻討贛州祥等如制奉行未幾贛州平是時江右郡縣多反側祥與黃參政從王師討之多預有功

王溥仕陳友諒為平章守建昌頗著聲望弟漢名漢二為友諒宣慰國初上嘗命師取建昌不克歲辛

丑正月院判朱亮祖率兵擊溥于饒州之安仁港溥以兵拒戰我師不利六月友諒將李明道寇信州胡大海引兵來援擊破之擒明道并漢二因送之朱文忠文忠令二人招溥復送之建康

命皆仍舊職八月上帥師討友諒取江西以二人為鄉道江州既拔友諒奔武昌溥遂以九月己酉朔遣使來降俾仍守建昌已而龍興守臣胡廷瑞亦具書納款壬寅正月上遂至龍興溥率眾來見

上慰勞之國初事蹟一云王溥以建昌降率將士赴京以居自備軍食不支官糧上曰王溥可于
乘寶門外南衙居之置立牌坊號其街曰宰相街一云王溥全城來降自備軍食不支官糧上入城拜

其母以安之二說不尋遣率兵取撫州及江西未附
同並存之以備參考
諸郡是年元張昶之來溥實遣人報于

上詳國初甲辰從克武昌遷資善大夫中書右丞洪武

元年諸功臣進秩詔溥無副詹事從大將軍克平山

東河南燕冀二年克陝西屢有戰功賜文幣七表裏

三年十二月天下既定論功行賞陞河南行省平章

上欲優待之令食祿而不視事子孫世襲指揮同知十

一年定諸臣歲祿之數刻石官署溥每歲七百五十

石于官田內給與與平章李伯昇潘原明祿同

吳宏餘干州人仕陳友諒為江西行省叅政守餘干

至正庚子七月鄱陽院判于光取饒州以其城來附

上命僉院鄧愈往鎮之屢殲友諒舟師威震境內宏深

懷疑沮辛丑愈以江南叅政行總制事推誠結納撫

以恩信宏大感激會

一親取江州友諒奔武昌遂全城請降上嘉其誠命

招諭龍興壬寅正月上至龍興宏率眾來見

上慰勞之遂改愈為江西叅政移鎮龍興宏代守饒州

尋遣率兵取撫州等郡調守撫州又從征下武昌以

功拜中書左丞後左遷親軍指揮宏涉獵經史能詩

工書奉母至孝見重於士大夫

彭時中元季以兵守言之龍泉歲庚子陳友諒弒主
僭號都九江時中屬焉授官平章辛丑八月
上帥師討友諒拔偽都友諒奔武昌時建昌王溥饒州
吳宏龍興胡廷瑞見九江已破相繼納款壬寅正月
上至龍興袁州歐祥亦附時中知天命有在遂舉城請
降上嘉其誠俾仍舊職守龍泉加兵權預征討甲
辰從克武昌是年常遇春征贛州熊天瑞固守不下
上命時中統兵會遇春等共擊之時中乃戒指揮鄧清
等嚴督所部同平章歐文廣等軍自吉安以南山寨
併力掃蕩盡絕直抵贛州

上復命郎中汪廣洋往諭遇春時中等曰天瑞困處孤
城猶籠禽阱獸豈能逃逸但恐城破之日殺傷過當
要當以保全生民為心一則可為國家用一則可為
未附者勸如漢將鄧愈不妄誅殺此可為法我前克
湖廣禁軍士毋入城故能全一郡之民苟得郡無民
何益時天瑞拒守益堅遇春時中等承諭乃浚濠
立柵以困之未幾城降

孫本立吉安人元季江右大部本立與吉水曾萬中
粹中兄弟同集義兵保障鄉里衆推本立為土軍元
帥歲辛丑八月

太祖帥師討陳友諒拔江州偽都友諒奔武昌既而友諒龍興守臣胡廷瑞見江州已破遣使詣軍中請降
壬寅正月 上至龍興建昌下府饒州吳宏袁州歐
普祥各率眾來見于是本立為中等皆來降

上慰勞之以本立為江西行省叅政萬中為都元帥粹
中為行軍指揮俾還守吉安

何真廣州東莞人少英偉好書劍元未歷河源縣務
副使嶺海騷動棄官歸鄉里率眾保障遂併有循惠
二州廣民賴以為安元授以江西分省江丞洪武元
年二月壬寅朔

太祖命廖永忠為征南將軍率舟師取廣東時永忠在
福州即先遣人以書至廣東諭真畧曰乃者元君失
馭天下土崩豪傑之士乘時而起分割州縣竊據疆
土或假元之號令或自擅其兵威暴征橫斂蠶食一
方生民塗炭可謂極矣今天子受天明命肇造區夏
江漢既以底定閩越又皆帖服中原之地相繼以平
惟兩廣僻在遐荒未沾聖化予受命南征順者撫綏
逆者誅殛恐足下未悞輒先告一介之使相告惟足
下其留意焉遂航海趨廣東三月壬辰師至潮州真
遣都事劉克佐詣軍門上其印章已亥復籍所部郡

縣戶口兵馬錢糧遣使奉表降永忠遣人送其使及表詣京師

太祖賜詔褒之曰自元綱解紐一 姓並爭天下瓜分未見定于一者朕舉兵濠梁創基金陵除殘去暴十有四年邇者遣將四征所向克捷撫有七閩肅清齊魯廣西之師相繼捷奏大將軍提兵北伐中原指日可定朕思昔豪傑之士保境安民以待有德若竇融李勣擁兵據險角立於群雄之間非真主不屈此漢唐名臣於今未見正此興歎爾真連數郡之衆乃不勞師旅先期來降其視竇李奚讓焉今特驛召來庭錫

爾名爵以旌有德於乎天厭紛紛人思平治爾之所舉實惟知時堅乃初心以懋厥績四月永忠至東莞真率官屬出見永忠慰譽之詔至真遂乘傳入朝

太祖授真江西行省叅知政事諭之曰天下紛爭所謂豪傑有三易亂為治者上也保民達變識所歸者次也負固偷安流毒生民身死不悔斯不足論矣頃者師臨閩越卿即輸誠來歸不煩一旅之力使兵不血刃民庶安堵可謂識時達變一 矣真叩頭謝曰昔武王伐暴救民諸侯不期而會者八百今主上除亂以安天下天命人歸四海景從臣本蠻邦之

人始者逢亂不過結聚鄉民為保守之計實無他志
今幸過大明麗天無幽不燭臣愚豈敢上違天命
太祖曰夫能不買禍於生靈者以仁其澤朕嘉卿忠
誠念江西地近廣東用是特設爾江西行省參政以
表來歸之誠古云令名德之興也卿令名已著尚懋
脩厥德以輔我國家真泣官有德有威施政發令風
行霆斷莫敢犯而一主於寬厚尤好儒術平居讀書
綴文無虛時後轉山東行省陞四州布政使所至有
聲加封東筦伯致仕卒子奉先有學行為士夫所推
重云

張良佐仕元為遼陽行省右丞洪武四年春故元平
章劉益以遼東之地來降

太祖遣斷事官吳立往宣詔置遼東衛於得利羸城以
益為指揮同知未幾故元平章洪保保馬彥翬共謀
殺益良佐乃與左丞房暉率部下擒彥翬殺之保保
走納哈出營遼東之衆因淮良佐為權衛事六月良
佐暉遣叅政張革行樞密院副使焦偶廉訪司僉事
李茂斷事崔恣都自遼東來言以送賊殺劉益逆
黨平章八丹知院僧兒等至京并上故元所授印章
宣勅金牌始以其事聞仍上其事于中書省曰忘身

徇國為忠自有公論復讎討賊為義夫豈私情故指
揮同知劉益總持戎旅鎮撫遼東知天命之有歸遂
全師而款附寵承明詔賜以印半錫賚有加感懷無
極蒙設遼東衛治俾之仍典鎮兵方盡小心遽罹凶
禍賴多士之協心執渠魁而就戮乃推良佐等暫權
衛事統率諸軍顧才德之劣微懼弗堪於負荷况本
衛地方遼遠僻處海隅肘腋之間皆為敵境其元平
章高家奴固守遼陽山寨知院哈刺張屯駐瀋陽古
城開元則有元相不花之兵金山則有太尉納哈出
之衆彼此相依互為聲援今洪保保逃往其營必有

搆兵之釁乞留 朝廷所遣 斷事吳立鎮撫軍民先
將禽到逆黨八丹等械送京 師及前遼陽行省山東
行樞密院銀印各一軍民大 小衙門銅印八十五并
各官所受前元宣敕金牌納 上右丞相汪廣洋以聞
以立良佐高二人為遼東衛 指揮僉事其餘將校從
本衛定擬職名奏聞銓注軍 人俾隸籍賜張革等文
綺衣各一襲是月遼東衛復 遣人奏言元將納哈出
據金山擾邊為遼陽患乞益 兵以備
上命黃傳以書諭納哈出反覆 示以利害置定遼都衛
指揮使司以馬雲葉旺為指 揮使總轄遼東諸衛軍

馬脩治城池以鎮邊疆分置諸衛官真改良佐與嵩
為蓋州衛指揮僉事八年納哈出八寇雲知其將至
命良佐等嚴兵城守虜至堅壁勿與戰及納哈出至
見城中備禦嚴不敢攻乃越蓋州城徑趨金州復為
金州守將韋富所敗虜勢大沮慮援兵且至引兵退
走不敢經蓋州城乃由城南十里沿柞河遁歸旺策
其將退與良佐等先引兵移柞河自連雲島至窟駝
塞十餘里緣河疊水為墻以水淋之經宿皆疑汨如
城巖釘板於沙中設陷馬穿於平地伏兵以待之命
老弱登山戒以聞砲豎旗旺與良佐等嚴兵以候虜
兵至俟其過城南砲發伏起旌旗蔽空鼓聲雷動矢
石雨下納哈出倉皇北奔趨連雲島遇水城馬不能
前皆陷入穿中遂大潰旺與良佐等乘勝追至猪兒
峪獲其士馬無算納哈出僅以身免良佐後以禦邊
功進指揮使

陶文興國初從征授先鋒取太平溧水溧陽破采石
方山二敵寨定金陵克鎮江丹陽廣德丙申七月
上置省院等諸司俱擇人授官置五部都先鋒以文
興等為之由是取常州路及寧國縣宣州悉備前驅
攻常熟無錫等州從下金華諸暨策應秋浦擊陳友

諒於龍灣拔同安皆預有功

潘敬國初從定江左戰楚漢取淮東平浙西以功授
金吾左衛指揮僉事洪武元年征進中原四月克河
南府七月河北衛輝彰德廣平河西務通州等處以
次皆下八月從大將拔元都剗龍革等山寨脩治北
平城池十二月取山西太原二年克鳳翔隴州鞏昌
臨洮蘭州平涼慶陽勢若席卷三年大破王保保軍
於定西蕩其營落征西河州擊土番又自秦州南出
一百八渡取興元回軍西安陞鞏昌衛指揮同知四
年伐西蜀從克階州文州青州果陽屢敗丁寇兵後

遼東都司都指揮使慎守邊城鎮撫軍民嚴兵備
禦納哈出等竟莫能為害應酬高麗屢承勅諭與
都指揮葉旺馬雲並稱名將

王德國初從征伐以戰功歷官指揮洪武四年故元
平章劉益以遼東地來歸

上嘉之置遼東衛以益為指揮未幾故元平章馬彥翬
等謀殺益其右丞張良佐等率部下禽彥翬殺之遣
人以其事來聞且言本衛地方遼遠僻處海隅肘腋
之間皆為敵境宜早遣官代益鎮撫軍民
上命良佐吳立房嵩為指揮僉事既而本衛復奏言元

將納哈出據金山擾邊為患乞益兵為備

上念遼東新附人心未安劉益之變始聞虜寇之擾繼至非大為之坊無以保固疆圉杜絕侵軼乃置定遼都衛以馬雲葉旺為指揮使吳泉馮祥為同知德為僉事總轄遼東諸衛軍馬以安反側鎮邊垂德佐雲旺等完城繕兵屯田興學政治一新已而納哈出入寇德與雲旺等合謀設奇出伏大敗之於金州及連雲島獲其士馬殆盡威望益著陞河南都指揮同知嘗一討西賊有功二十一年北征捕魚兒海哈刺哈等地是時納哈一出既降其達軍數十萬有安置陝西者中途叛逆德追至延安麻街等處勦平之尋陞都指揮使

李敬洪武初為四川都指揮使時羗氏鄭黑太作亂敬擒之特陞都督同知仍守四川後戎縣山民嘯聚為盜敬討平之民安其業

趙祥國初從定江左諸郡邑破安慶擣江州下豫章戰彭蠡降武昌以功授金吾左衛管軍正千戶繼取廬州通州海安秦州丙午四月拔濠州復從大將徐達攻安豐於龍尾壩穿其城懷忻都竹昌左君弼皆出走追之獲忻都并君弼裨將賁元帥昌君弼皆

走汴梁仲貞引兵來援復與戰于南門外大敗之貞遁去所得兵馬錢糧數多又將兵至穎獲其運船以歸遂克安豐八月從伐張士誠奪昇山舊館下湖州丁未九月平蘇州賜綵段表褒陞本衛指揮僉事洪武元年征中原三月克汴梁四月克河南府閏七月河北衛輝長蘆河西務通州皆下之八月進克大都及龍華等山寨脩

池轉戰山西十二月有

太原之捷二年兵趨鳳翔秦州鞏昌臨洮蘭州平涼所至皆靡遂與諸將戮力而攻慶陽凱旋賜白金文幣三年征王保保破其軍於定西擊西河州土番回取興元中原平陞指揮同知

何世隆滁州人沈勇而決當元季羣雄割據世隆糾義兵守滁城以信義為衆嚮慕歲甲午秋七月

太祖駐兵滁陽世隆率所部歸附授以萬戶俾仍守滁丙申陞右副都元帥時州境當兵革之後民物凋弊世隆盡心撫綏衆賴以安壬寅五月以病終於官

袁政國初從取太平破水陸二敵若克金陵拔鎮江徇下廣德授萬戶丙申十月圍毗陵與諸將戮力攻取丁酉三月平之率兵取寧國縣宣州兵來援擊敗之遂併有二城六月征進江陰捷於甘露七月從擣

休寧績溪乘勝克徽州元將敗走陞雄峯翼管軍總
管守禦九月與胡天福江大亨帥師攻開化敗其守
將邵千戶斬首五百級生禽達魯花赤脫帖木兒
十月浙江苗楊元帥領衆十餘萬來攻徽時徽新附
城郭未完兵器未備政從鄧愈等奮兵力戰大殲其
衆縛部將胡辛等一百五十八人餘皆奔潰戊戌正
月從愈討婺源州擊破鐵木兒不花若斬首數多追
至東門禽殺鐵木兒不花獲士卒三千餘人遂舉婺
源自是取嚴州攻淳安拒苗楊之衆于烏龍嶺略臨
安敗張寇于關林皆預有功

秦友諒國初從定姑孰破中丞水砦克般巷拔南堽
南徐丹陽金壇累功授元帥隨攻晉陵寧國江陰無
錫等州效勞有加歲己亥上平婺州回諸將用兵
江淮八月辛酉朔友諒與元帥朱文遜率兵取無為
州克之

朱寶初名國寶避諱專名寶國初取姑孰克建康南
徐桐汭攻下毗陵及寧國縣宣州累功授萬戶從鄧
愈取休寧績溪乘勝破徽州元將敗走苗帥楊完者
以兵十萬來攻從愈擊敗之生禽數十人戊戌正月
從攻婺源殲其守將鐵木兒不花斬獲不可勝計遂

拔其城復以愈命率兵攻京島河壘自是三月取嚴陵四月攻淳安敗賊帥金子珍俘獲人馬甚衆五月却完者兵於烏龍嶺己亥正月從略臨安與張士誠戰於閑林士誠敗績寶陞副元帥

翁子奇國初預征伐立戰勲授官指揮歲丁未江南既平遂從征中原破齊魯數州洪武元年克汴梁洛陽衛輝等處八月庚午從大將徐達拔元都十二月丁卯克太原擴廓帖木兒遁去是時大將以太原初下或生反側而王保保賀宗哲等又各窺伺其諸要害地必慎守禦乃遣右丞薛顯參政傅友德等率步

騎邀擊賀宗哲等軍於石州以子奇統兵守大谷以防寇兵侵軼一時分遣者有戴復初署霍州丁玉明署忻州蔣應宗署鄆州

胡汝臨淮人勇毅善戰元季濠泗兵亂汝聚衆保障鄉曲歲壬寅以所部來歸即授萬戶從戰彭蠡克武昌盜陽常德攻江陵潭岳等處綽有懋功爰取泰州高郵東平吳會甌越北伐中原勲勞益著進常德衛指揮同知累陞浙江都司都指揮使授詔命階驃騎將軍洪武十一年三月十日以疾卒 賜祭遣工部郎中馬某治墳建祠象設石 等物命嚴成胡敬守

之子琮襲廣東廣海衛指揮向知

王雄廬州人國初從征伐立戰勲授官指揮累陞河南都司都指揮使賜誥階驃騎將軍

周賢國初從征江南伐楚漢轉戰淮東浙西以屢功授指揮僉事歲丁未冬從取中原破齊魯數州洪武元年克汴梁洛陽陝州衛輝德州河西務八月庚午隨大將拔元都剡龍華等山寨遂征山西十二月丁卯取太原擴廓帖木兒乘夜遁去甲申以大將命與指揮曹崇王約將兵往介休平遙討捕紅蓮溝山寇尋平之二年從發太原克河中鳳翔隴州鞏昌臨洮

平涼進圍慶陽與諸將戮力攻取守將張良臣拒戰不利久之城中食盡外援不至八月癸未城破執良臣戮之遂克慶陽師旋賜文幣表裏三年從征王保保于定西擊西河州取興元皆預有功

鄭彥文本蔚州人仕元為萬戶入蜀居彭城因家焉本朝平蜀率土官首先歸附授貴州宣慰使洪武六年調潼川知府未幾仍改宣慰從征雲南有功進陞工部右侍郎卒于官

戈預廬州梁縣人歲乙未和州歸附扈蹕渡江拔采石大平克金陵鎮江常宣在婺策應龍灣破同安

潯陽下豫章戰彭蠡平武昌取廬秦湖蘇及浙東北
征中原積有勲烈由指揮歷陞中軍都督府都督坐
謫行伍子戡洪武三十五年有功陞尚裨使以其官
遜子兄弼任廬州衛後調濟寧左衛弼以疾請歸職
於戡陞廣東都指揮僉事

王忽雷國初從取姑孰克建康京口桐汭毗陵授總
管丁酉夏六月從吳良取江陰奮先力戰敗其守兵
於秦望山遂克其城陞元帥良以指揮守江陰忽雷
佐之戊戌秋張士誠遣衆來侵出兵迎擊大挫其鋒
賊敗獲所棄弓弩甲仗以千數明年春二月寇復犯

境蒙衝蔽江有頃萬衆陳于江壩忽雷以良計與副
帥吳國寶整兵北門當其西北面以十餘騎蹂之禽
其卒數人餘黨莫敢前急分兵攻東門又為我師所
破偽將蘇同僉以下皆遁去冬十月寇逼常州引兵
于無錫三山殲其援兵自是敵大震懾相戒勿犯烽
燧無警人賴以安乙巳春二月十有九日奉

密旨領江陰城中精銳馬軍一百往淮上助攻濠州
安豐獲人馬而還丙午調征湖州丁未攻蘇州皆預
有功吳平賜綵段表裏從良蘇州守禦

陶成濠州廣德鄉人壬辰兵亂與弟信俱以勇力事

太祖從取定遠五河盱眙滁和二州乙未六月扈
蹕渡江拔采石太平溧陽溧水丙申破中丞也先砦
克南臺京口丹陽攻毗陵所向悉與信俱而成戰功
為著授成總管自是成從下婺州擣江州殲楚漢轉
攻金斗戮力淮東進管軍正千戶丙午圍困湖州明
年從諸將平蘇州賜彩段表裏遂征沂州益都等處
洪武元年克汴梁河洛北取元都陞彭城衛指揮僉
事攻晉蹙秦獲虜沙漠三年遷指揮同知授懷遠將
軍誥與世襲三十五年五月調福州衛同知永樂初
卒弟瑾襲調和陽衛年老子福安襲征南有功陞左

軍都督府都督僉事

謝三鳳陽縣人信國公湯和部將也國初從取姑孰
禽元將陳也先克溧水句容鎮江金壇拔常州隨守
禦進攻無錫破張士誠兵於錫山援長興取永新丙
午從略太湖降呂珍於舊館轉戰湖州擊吳江丁未
平定姑蘇皆預有功和總兵征浙東福州延平三年
在行效勞惟劇洪武元年從取懷慶澤潞晉絳二年
拔河中渡河入潼關趨鳳翔隴州鞏昌臨洮平涼皆
下大將軍達與和謀取慶陽令和遣軍往涇州別遣
指揮張煥將騎兵偵邏慶陽會三遣人招慶陽守將

張良臣良臣以其兄思道先走寧夏為擴廓帖木兒所執遂以城降既而悔之後叛大將怒促師攻之三與諸將戮力從事良臣出兵拒戰不利遣人求救又為我師所獲久之援絕食盡力不能支八月癸未遂克慶陽明年隨至定西襲破擴廓帖木兒營西北取靈夏抵蔡軍惱兒定東勝大同咸有成績

楊義廬州巢縣人歲乙未於元帥俞昭下從軍渡江屢立戰勲累官至遼東都指揮僉事後調福建永樂三年致仕卒于家禮部遣本縣蕭樂諭祭

陳恭濠州定遠人歲甲午二月從繆千戶於大橫山

歸附七月自塔山進兵克滁州乙未正月克和州新河六月扈 蹕渡江克采石大平丙申二月破中丞水砦三月剗陳先也營遂取南臺鎮江四月取金壇六月取廣德八月從陳都先鋒攻常州丁酉四月覆寧國縣宣州八月擣馬馱沙戍戌十月復宜興十二月從下婺州己亥正月與諸暨進攻紹興九月奪衢州庚子閏五月偽漢陳友諒突犯龍江重兵壓境從馮指揮奮擊之友諒敗去遂復太平癸卯三月授龍驤衛百戶從蔡暹元帥援安豐回攻廬州七月血戰鄱湖八月殲友諒於禁江口九月從攻武昌甲辰二

月薄武旨城放賊朴張為大軍應武昌以平七月有
廬州之捷八月征中興湖南衡州乙巳十月取永新
獲周左丞兵衆十二月策應安吉丙午七月參隨大
軍討浙西十月降舊館十一月下湖州吳江丁未九
月入蘇州滅吳陞金吾左衛管軍千戶洪武元年二
月從趙指揮征中原三月克汴梁四月克河南府授
流官誥武畧將軍閏七月渡河征衛輝廣平河西務
等處八月隨大將拔元都并龍葦等山寨脩治北平
城池以指揮潘敬委管船通州二年二月故元丞相
也速將萬餘騎來寇守將等議以彼衆我寡不可與
戰而可以計破乃命恭等於沿河舟中各樹赤幟巨
數十里鈺鼓之聲相聞也速軍大駭遂引去恭等追
之不及而還調征陝西克鳳翔秦州鞏昌臨洮蘭州
平涼從圍慶陽併力攻取張良臣屢戰不利城遂下
三年四月翦王保保軍於定西夷其營落趨西河州
擊土番回取興元十月至安西復援興元殄賊衆十
一月陞橫海衛指揮僉事賜誥階宣武將軍與世襲
四年正月從廖永忠伐蜀二月克歸州李逢春烽火
山砦六月十一日斬瞿塘關十八日破重慶以功受
賞十月調興化衛視印九年十二月調永平衛授廣

威將軍十二年正月調通州衛十三年二月調府軍
衛換宣威將軍俱有誥是冬調

皇陵衛十九年調寧國衛視印二十年二月從宋國公
征納哈出至遼東金山納哈出走閏六月一日追至
一迷河降納哈出獲士馬不可勝計回駐薊州二十
一年三月征捕魚兒海哈刺哈等地十月納哈出所
部達軍有安置陝西者中途皆叛從河南都指揮王
德追至延安麻街平之二十二年五月坐陳壁追問
事謫戍平越明年十月從指揮王先攻大麓洞十二
月征百夷及龍郎谷定琵琶得千等寨前後斬首若
干級又明年四月從總兵征龍海黑窰等處六月守
平化堡二十五年取勦復職病莫能興三十二年冬
召赴京命從何都督德州訓練士卒明年三月復除
重慶衛指揮四月卒于德州無嗣姪忠三十四年襲
恭職三十五年提調江陰等衛海舟龍灣操練陞指
揮使調武德衛八年從安遠侯征漠北回衛卒于政
孫全曾孫璽世襲武德衛僉事

黃榮國初從定江淮攻討楚漢戰吳會取中原以功
授和陽衛指揮洪武辛亥從傅友德伐蜀克階文綿
漢等州進克成都勞績益著已而從克保寧友德留

崇駐守未幾李文忠經理四川調濠梁等衛官軍置千戶所守禦崇得代還是年冬論平蜀功賜白金文幣

韓春濠州人元季兵亂以驍勇從官府揆拔為民兵長歲癸巳來歸從克滌和渡江拔牛渚太平破敵砦克南臺南徐金壇桐汭毗陵宣城授百戶取同安濠陽豫章武昌廬州永新通泰湖蘇以及中原益著戰勲由管軍千戶陞指揮僉事與世襲賜誥階明威將軍孫倬陞大同都指揮僉事

胡淵字子淵濠之定遠人剛毅有膂力才識精敏歲

甲午橫山歸附從克滌和扈 蹕渡江拔米石太平

溧陽割蠻子海牙水砦克叛巷 取建康京口皆亢居

前部乃攻毗陵宮二城江陰馬馱 沙下之授百戶從取

婺州諸暨策應結濠揚橋皖城潯陽征蘄黃援安豐繼

有彭蠡之戰武昌之圍金斗之 取海陵之攻勞績隨

著陞 安豐衛千戶 奪昇山營蹙降舊館捷于湖州力破

姑蘇而吳滅旌冊彩段表裏再 征齊魯汴洛燕晉秦

隴馬跡所至勲績有加 由羽林衛指揮僉事 誥授世

襲洪武十四年從征南十一月 克普定普安十二月

克雲南府十五年十二月克 大理縛土酋段世遠取鶴

慶略麗江下石門金蔭由是車里平緬等蠻皆率來

降擢金雲南都指揮是時夷情初附尚多反側淵築

城浚池開屯田練士卒脩厩宇不數年軍政悉舉邊

境靖謐陞四川都指揮使號稱名將子琛字廷貢好

學有雅度繼掌金蔭同事興學訓農安邊勵俗以光

大其先業後調交趾順化衛指揮使其長子琮任驃

騎衛親軍指揮使亦振家聲先琛卒配范氏封夫人

理家有賢德琮琛成立夫人教居多洪武三年嘗朝

高皇后於中宮賜以珠冠禮服十三載復入朝勞問賜

燕賚以綺段羊酒人皆榮之孫三人嬰璽

皇明開國功臣錄卷二十七

定遠黃金

王瑛 柴虎 徐大興 曹諒 王才

徐秀 程華 李廷琛 張煥 周俊

薰勳 范震 趙興貴 張良 楊璟

鄧暉 陳政 吳永寧 周能 翁德

嚴淵 紀斌 劉元成 張泰 王銘

王瑛字君寶廬州梁縣人元至正中盜起汝穎瑛與

兄玉俱以良家子從軍玉用捕虜功補義兵千戶瑛

常從之不去 上起丘 濠王灼知曆數有在與瑛

率所部來歸

上嘉其誠俱留衛帳下玉由千夫長陞萬夫長由萬夫長陞副元帥其夷繆家山蹂黃墩蕩湖口剗彭祖寨取滁和兩州奪米石太平破溧陽溧水克宣城臺城覆南徐擣毗陵擊常熟張士德戢陵下金華拔諸暨戰臨清掀蕭山鎮三衢擢廣信俘李明道雖曰善陣善戰以濟厥勲亦以瑛恒在左右以資羽翼相為犄角也瑛白皙長身揮戈躍馬先士卒以赴敵矢石交下意氣彌振堅城勅將身至力取一軍皆下之玉自廣信徵入朝瑛提其師從平章鄧公復臨

川援南昌有錦袍之賜玉還金華謝再興犯義烏東陽瑛力戰却之授千夫長則甲辰六月也七月玉率廷議以瑛久在兵間聲望素著立命統其衆加領兵官明年二月張士誠盡銳侵我新城從平章李公出戰獨當一面引旣健善擊士舞槊衝其中堅生禽偽官陳德等三十四人斬首七十八級遂奪其氣大衆乘之賊大敗橫屍蔽野委棄資仗舉之數日不盡受上賞因與元帥何世明攻沿山捷于紫溪遂從叅軍胡公進攻滿城陣于古秋橋于西陽嶺于景江橋于南峯寺自閏十月十五以至二十二日大小之戰數

十奪名馬十五破砦二斬首二千餘級虜將校五十餘人降卒八百餘人凡賚銀橐十有四枚米百有八十石頒之麾下又明年從李公取桐廬富陽餘杭遂入錢唐寵以襲衣又明年錄其前後功勞陞指揮副使仍鎮金華實指揮使徐某為之請云洪武改元之春李公移兵建寧延平拔瑛以從就命撫安汀州還從胡左丞捕寇海中蘭秀山殲之分兵略將樂朝天明溪白雲虎頭黃龍青龍等砦悉降其衆二年加明威將軍從李公北征行至通州病內熱平章鄂國常公俾昇歸金華就醫藥六月七日歿于毗陵年三十

五

上聞而悼之命賜衣廩土田存恤其家是年十一月二十四日祔于當塗縣姑熟鄉李家原玉墓左妻夏氏子一人僧家奴自古帝王之興命世之材應期而出以弼成大業匪直股肱重臣及厥登陴陷陣塞旗斬將之士皆其流匹也百世之下尚論造周興漢知有十亂三傑而已其策勲行陣之間不在封侯之列或名存而事功無徵或身沒而姓氏俱泯夫豈少哉然則瑛以忠事上以恭承兄以材勇自見奮身行伍列職環衛勞烈懋著于國家雖曰簡在

上心然亦不可無述也

柴虎國初從征江南取晉陵拔宣州江陰攻壽州從
上親下婺州破諸賊三衢策應龍江復同安擣潯陽援
長興累功授管軍千戶李文忠總鎮廣信睦婺等處
虎為部將提兵往來以援益著勲績乙巳二月張士
誠謝再興以兵寇新城二十萬虎從文忠援之殊
死戰敵大敗斬獲無算賜銀兩米幣丙午從文忠取
桐廬富陽餘杭等處遂克杭州以功陞指揮副使丁
未九月從叅政朱亮祖率馬步舟師討方國珍克新
昌天台進攻台州方國瑛出兵迎敵我師擊敗之國

瑛奔黃巖兵至黃巖國英燒厝宇民居遁海上十月
攻温州陣於城南七里方國珍遣衛兵拒戰復擊走
之破其太平寨追北至城下餘兵奔入城亮祖復遣
指揮張俊徐秀攻其東西二門虎將遊兵往來應援
晡時克其城獲其負以郎劉本方明善已娶妻子遁
去十一月從攻明善於樂清明善及國瑛皆降于亮
祖虎守温州

徐大興國初從取姑孰溧陽破水陸敵砦克金陵鎮
江金壇丹陽累功授元帥丁酉三月克毗陵五月同
江淮分院副使張鑑命院何文政率師攻泰興張士

誠遣兵來救大興擊敗之禽其將楊文德等遂克泰
興尋攻泰州六月攻高郵十月從克揚州戊戌復宜
興從 上親下金華己亥克諸暨自是援龍灣破安
慶擣潯陽勲績益著辛丑援長興明年策應浙東乙
巳從李文忠援新城丙午克桐廬富陽進取杭州陞
仁和衛指揮僉事吳元年九月姑蘇既平遂從御史
大夫湯和討方國珍克慶元復從征閩下福州洪武
元年正月克延平禽陳友定先是

上遣使招諭友定友定不從誓眾以死守城至是攻城
急友定窮蹙乃退於省堂仰藥飲之衆師入城友定

氣未絕遂昇之至東門復甦械送京師其子海聞其
父兵敗自將樂來歸遂併執之大興乃往撫諭將樂
安輯其民人復從和造海舟饋運還平昌國海寇皆
有功

曹諒國初從取江淮攻兩浙滅楚漢平吳系積戰功
歷官指揮僉事丁未冬從大將軍徐達征中原破沂
州益都洪武元年克東昌樂安三月克汴梁四月克
河南府進兵陝州五月辛巳復從大將自陝還至河
南會登封鞏縣雞翎山并天堂山寨復叛大將命諒
率兵討之是月辛卯諒同指揮唐英攻破雞翎山寨

獲叛將其送大將所斬之天堂山寨聞王師破雞翎
懼而乞降于是旁近山寨多所戡定從征河北衛輝
彰德廣平絲臨清引兵北取元都轉戰山西鹿臺河
中二年從克陝西鳳翔秦隴鞏昌臨洮平涼慶陽等
處十二月賜白金文幣又從擊王保保於定西拔其
營保保遁沙漠三年進指揮使

王才滁州全椒人素以材武稱歲乙未扈從渡江克
采石太平水陸敵砦金陵京口晉陵婺州諸全援龍
江破安慶擣潯陽下豫章戰彭蠡平鄂州淮東浙西
南征閩廣皆預有功累官至廣東都指揮使授驃騎

將軍

徐秀國初從取江左攻吳興下婺州克諸全策應龍
濟拔江州援長興士宙援婺處二州李文忠以左丞
總制嚴衢信處諸全軍馬秀屬焉張士誠率兵十萬
圍諸全從胡同僉擊敗之以再興犯東陽復敗其衆
乙巳士誠兵寇新城號二十萬從文忠擊之寇兵靡
亂死者數萬復隨指揮張斌等擣其餘寇俘獲甚衆
丙午從文忠取桐廬富陽餘杭克杭州累功陞指揮
僉事丁未秋姑蘇既平從叅政朱亮祖率師討方國
珍克新昌天台進攻台州方國瑛出兵迤敵擊敗之

國瑛奔黃巖兵至黃巖國瑛遁海上守將哈兒魯降
遂攻溫州陣于城南七里敗方國珍衛兵破其太平
寨追北至城下餘兵奔入城亮祖遣秀攻其東門張
俊攻西門敵不能支晡時克其城獲其負外郎劉本
方明善挈妻子遁去秀從入城撫諭其民未幾復敗
明善於樂清之盤嶼山明善國瑛皆來降

程華國初從取江淮定荆楚平吳會累積戰功歷官
指揮僉事丁未冬從大將軍徐達征中原克青兗等
州濟寧等處洪武元年拔東昌棗州大將率師西取
河南華從都督張興祖等守禦山東反王師平關陝

大將乃檄興祖華等以師會木昌閏七月大將師至
德州興祖華等俱以師會遂同北上取長蘆滄州直
沽河西務通州勢如破竹八月庚午從大將進取元
都九月下保定中山十月下懷慶遂征山西二年從
征陝西鳳翔秦隴鞏昌涇州慶陽皆有功

李廷琛國初從取江南晉陵徽州婺源攻雲川援龍
灣佐平饒州擣潯陽徇征蘄黃下豫章鏖戰彭蠡甲
辰定武昌江陵湖之南北乙巳從克襄陽安陸等處
以屢功擢授景陵衛指揮副使鄧愈以湖廣行省平
章出鎮襄陽廷琛屬焉巖號令練軍伍繕兵甲脩屯

田西禦王保保兵遇征討則備前驅洪武元年四月
上勅諭愈曰即目總兵官大將軍信國公徐達副將軍
鄂國公常遇春統領大軍已於三月二十九日克復
汴梁見行進取河南等處城池教御史大夫鄧愈統
領襄陽安陸景陵衛官軍前去征取迤北未附城池
其景陵衛徐存留官軍守城外其餘軍馬教指揮副
使李廷琛統領參隨征進先是三月愈命廷琛同指
揮王成等率師取唐州又取南陽至是奉

旨即命廷琛同指揮吳復等攻取南陽各屬克之又
平新寨麻張等叛賊克光石腦寨及降寨舞陽魯山

等縣從拔隨州九月擊洪山

聖示斬關而入擒

殺甚衆是年冬從討蜀河莽張獲之一是金商均房
諸州悉定三年西擊王保保營五年從討澧州等處
溪洞蠻夷皆有功

張煥國初為先鋒以勇捷備侍衛給使令甚見優寵
命從征討累立戰功歷官指揮僉事吳元年冬從大
將軍徐達征中原破山東諸州洪武元年克大梁河
南府陝州衛輝彰德邯鄲長蘆直沽通州八月庚午
從大將進取元都師至齊化門填濠登城而入執其
監國諸臣戮之封其府庫及圖籍寶物又封故宮殿

門大將令煥以兵千人守之遣官赴京獻捷既而改元都為北平府置燕山等六衛命都督孫興祖統兵守禦煥遂從征山西等處二年從克陝西鳳翔隴州鞏昌臨洮平涼勲績益著大將以平涼既下即謀取慶陽令御史大夫湯和遣軍往涇州別遣煥將騎兵偵邏慶陽會和部將謝三招慶陽守將張良臣良臣以其兄思道為擴廓帖木兒所執遂以城降尋復叛大將怒遂自涇州率諸軍趨慶陽煥邏卒獲慶陽小元帥謀者張五十九送大將斬之從攻慶陽四面圍之良臣出戰不利久之援絕食盡八月二十一日城破良臣投井中死慶陽平以功賜白金文幣

周俊鳳陽縣太平鄉十四都一圖人壬辰兵亂即附太祖從敗賈魯兵克五河定遠永陽和州叛門寨護

蹕渡江拔牛渚姑孰溧陽破中丞水砦剡方山營覆臺城南徐累功授總管攻圍延陵下東陽諸全援龍江伐潯陽策應壽春解豫章圍鏖彭蠡鄂州阮平轉戰金斗進擊荆湖規淮

身海安秦州而力取之丙午

四月從顧指揮取濠泗攻其水濶洞月城復以雲梯砲石四面並攻敵不能支遂克之東畧浙西奪舊館吳興明年入平江執偽吳錄其前後功陞濠梁衛指揮

揮副使從征中原戮力克沂汴洛等處三年改鳳陽
衛以金甕重作卒于官子義襲調福州衛孫真調浙
江海門衛俱指揮副使

董勳國初從取江南江右殲楚漢克淮東浙西積有
戰勳累官指揮副使吳元年冬從大將軍信國公徐
達征中原破山東數州共武元年取浚儀河洛陝州
衛輝彰德廣平臨清長蘆直沽河西務通州八月進
克元都改為北平府九月甲子從副將軍鄂國公常
遇春率兵發北平取未下州郡乙丑下保定丁卯下
中山府即今定州遇春以勳統兵守禦中山撫綏勞來軍

民悅服二年調征陝西回御示十二月大賞定中原及
守禦功賜白金文幣

范震滁州人學士常兄之子有材武謀畧過人至正
甲午王師薄滁城震歸附乙未克和州授百戶護

陣渡江克米石姑孰溧水蕪湖中丞舟師陳也先陸
若金陵鎮江接管軍總管延陵為張士誠所據從諸
將攻取之大敗張九六援兵下宣州池州擊吳興從
上取寶婺策應龍灣破皖城伐潯陽援安豐鄱湖鄂渚
之戰戮力尤多遂捷于江陵于竟陵于海陵拔昇山
降舊館園克姑蘇陞指揮副使繼以討叛賊取中原

功陞指揮使洪武中進陞左軍都督府都督僉事後
左遷洱海衛指揮同知

趙興貴國初從平江左攻延陵取長興武康擊湖州
拔安吉下婺州諸全援長興累功授元帥策應慶州
從李文忠援新城斬獲甚衆縛呂珍於舊館降李伯
昇於湖州皆預有功合圍姑蘇士城就執陞安吉衛
指揮副使賜綵段表裏從大將徐達征中原破青兗
濟隸洪武元年克汴洛衛輝彰德廣平長蘆直沽通
州進取元都下保定中山十一月大將師至真定會
常遇春于柳亭調諸將分守要地乃令興貴往守通

州二年二月故元丞相也速侵通州時大軍征山西
北平守兵單寡通州城中亦僅千人也速將萬餘騎
營于白河守將曹良臣戒部下勿與戰宥遣興貴等
於沿河舟中各樹赤幟巨三十餘里鉦鼓之聲相聞
也速望之驚駭遂引遁去城中出精騎渡白河追之
至薊州不及而還是年十二月大賞守禦功賜白金
文幣

張良國初從征討累著戰勲歷官指揮吳會既平從
大將軍徐達征中原破兗青濟隸等州及浚儀豫州
河北衛輝彰德廣平滄州通州進取元都徇下保定

中山漢慶遂征山西平陽太原所向有功洪武二年
二月大將師自平陽次河中遣良造浮橋選士馬從
副將軍常遇春馮宗異先渡河趨陝西遂克之良從
大將取鳳翔隴州鞏昌臨洮平涼涇州進攻慶陽張
良臣以兵拒戰擊敗之從諸將合圍並攻久之援絕
食盡良臣力不能支八月癸未城陷慶陽平賜白金
綵段三年從大將征沙漠破王保保軍于定西偵哨
極西北始還

楊璟濠州定遠人世居東城鄉業農璟生而驍勇慵
事家人生業正正中兵擾鄉邑遂以乙未六月歸

上於和陽充施楊元帥下先鋒護蹕渡江克太平丙
申二月攻取中丞水寨三月破陳也先營乘勝取南
臺鎮江丁酉三月下常州四月奪寧國縣宣州六月
下江陰營于甘露陞前部先鋒己亥八月征安慶于
寅降南昌已而祝宗廣變克復之從大都督朱文正
守禦癸卯陳友諒犯南昌擊敗其衆陞管軍百戶乙
巳召回授威武衛百戶丙午參隨大軍征進浙西克
湖州嘉興等處吳元年九月克蘇州陞虎賁左衛管
軍正千戶洪武元年二月從都督康茂才往濟寧佐
征中原會大將信國公徐達取汴梁從鄂國公常遇

春取河南府四月誥授武德將軍克嵩州汝州追黃
平章又克陝州潼關信陽府等寨回軍北京汴隨馮
都督河陰濟師克懷慶碗子城過太行取平陽絳州
大敗韓國公軍趨太原會大軍隨鄂國公取西京二
年二月又自河中渡河克陝西鳳翔四月有

旨命回信陽唐州等處收捕叛賊五月皆平之六月
復趨陝西調往陽安攻取周原堡寨十一月從大將
班師十二月陞杭州衛指揮僉事明年四月授宣武
將軍賜流官誥尋陞本衛指揮同知四年誥授世襲
懷遠將軍未幾坐盜法事降總旗已而復除廣東衛

指揮僉事署都指揮使司事復改廣州左衛僉事賜
誥父再興贈宣武將軍母張氏封德人五年六月海
賊李夫人鍾萬戶徐仙祐叛於海晏下川大譖文持
等地即同指揮范懷遠率師往勦至陽江海陵并上
川惶驚門遇賊船二百餘艘擊敗之斬獲偽總兵鍾
福全李夫人賊衆一百七十人焚其船雷州衛東海
澗州沙頭洋有海陵海晏賊船劫掠於通明浦又徐
聞賊船出流行劫隨率舟師至斷頭山遇賊船出
洋督官軍追至連頭港與戰至那泥港殺溺死者甚
衆生擒賊首偽總兵陳貴得等二十八人斬于軍前

又令雷州衛千戶王濟等追捕逋賊羅已終於番浦
港殺海陵賊二百餘人又於吳川縣東海涸州殺獲
賊首譚南受等三百八十五人又於翁家港禽賊首
梁許進又會海南官軍捕羅已終至烏雷門略無蹤
跡頭目傅思梅等四十七人請降遂給榜諭衆撫安
其人民是年十二月緝知羅已終遣其子景茂逃往
交趾即命王清同海南千戶周旺汪滿等捕之獲賊
桂黃三舍等五百八十二人又獲廉州府石頭昆城
大廉賊沈三秀等四人隨擄頭目李福等獲羅已終
同惡叛首偽千戶蘇稱高等四人六年正月雷州衛
僉事朱宣武欽州沿海巡檢呂庸俱報於龍門七十
二徑等處搜獲羅已終賊伴云已終已於正月二日
為賊所殺賊衆潰散及安南國雲屯海鎮經畧史關
報相同環乃率原部舟師回衛十一年授世襲誥十
二年三月卒于官妻羌氏封德人子二人長儉二十
五年襲甘州前衛指揮僉事三十二年卒次昇襲西
安左衛僉事調山西平陽衛永樂八年卒孫貴洪熙
元年襲平陽衛僉事曾孫輔玄孫大振世襲本衛僉

事

鄧睥初預征討累立軍功歷官指揮歲丁未姑蘇

既平燕大將軍徐達征中原破山東諸州洪武元年克汴梁河南府陝州衛輝廣平德州滄州通州八月庚午從大將進取元都師至齊化門填濠登城而入執其監國諸臣戮之獲其玉印玉璽封其府庫圖籍寶物及封故宮殿門大將乃遣睥赴京獻捷

上大悅改大都路為北平府置衛託守睥遂從大將征山西克保定七塚等山熒十二月克太原二年從取鳳翔龍州鞏昌平涼又攻克慶陽戮張良臣三年征沙漠敗王保保軍於定西皆有功

陳政邳州人當元末淮東大亂集兵捍寇盜歲丙午天兵下淮安政率所部歸附從伐姑蘇北征中原齊魯汴洛秦晉等處驍勇過人所向有功授指揮累陞中軍都督府都督

吳永寧國初從征江南破皖城擣潯陽下豫章援安豐戡彭蠡平武昌取益陽常德江陵等處又從克襄陽安陸積有戰功累官荊州衛指揮使丁未冬十月命湖廣平章楊璟率師取廣西永寧為部將洪武元年正月師次永州擊敗鄧祖勝兵進取全州道州藍山武岡四月祖勝自殺永州平遂從璟進攻靖江先是璟圖永州周德興分兵據靖江險要以絕其聲援

璟既克永州遂引兵抵靖江城下屯於北關叅政張彬屯南關朱亮祖亦率師自廣東來會屯於東門合攻其城凡兩閱月攻之益力元平章也兒吉尼勢窮蹙其總制張榮與麾下裴觀以書繫矢射璟營約降期以六月壬戌夜來會登二鼓觀縋出見璟備言城中儲積空虛人無鬪志可立取之狀璟乃給白皮帽百餘俾歸為識約四鼓從寶賢門入至期璟命永寧等率衆登城而入也兒吉尼聞變倉卒出走永寧追至城東伏波門執之亮祖等各以所部兵入城遂克靖江其都事趙元隆陳瑜劉永錫廉訪司僉事帖木

兒普花元帥元禿蠻萬戶董丑漢府判趙世傑皆自殺送也兒吉尼於京師于是左右兩江及象州郴州等處土官守將等以次皆降廣西悉平三年三月論功第賞賜文綺帛各六疋

司龍鳳陽縣人從渡江克太平溧水句容破水陸敵砦取金陵鎮江毗陵寧國宣州下寶婺攻同安援龍濟擣潯陽偽都攻斬黃血戰鄱湖席勝而平鄂渚轉奪金斗立功淮東其路吳興拔平江預有勞效從討中原所向克捷歷百戶總管千戶洪武元年陞指揮僉事十四年卒晉從征普定普安曲靖克雲南府十

五年己戌三月二十三日進攻大理段氏負洱河一水之固歛兵守龍尾關拒敵能從大軍由洱河躍渡遂克之段氏就禽留兵戍守未幾逋蠻普顏篤聚眾復叛據佛光山為寨十六年癸亥二月能復從大軍臨寨一鼓而破之普顏為伏誅餘眾悉平

上以大理重地夷情叛服靡常置大理衛指揮使司以能為指揮同知統兵鎮禦十七年城大理垣墉渾堅檣堞壯麗創立四門東曰通海西曰蒼山南曰承恩北曰安遠建樵樓明鐘鼓街共心曲通閭閻輻湊又於上下兩關築城以捍寇亂申嚴政令訓練士伍防衛

周而邊境用謐號稱智能

翁德國初從取江南平楚

漢克淮東累著奇勲任管

軍正千戶丙午八月從諸將攻浙西直趨湖州水陸鏖戰敗張士信援兵于舊館十月舊館降十一月從下湖州遂攻蘇州大小之戰數十丁未九月蘇州破禽張士誠師還論功陞太倉衛指揮僉事統兵守禦洪武二年春倭寇出沒海島中數侵剝蘇州崇明殺傷居民奪貨財沿海之地皆患之四月德率官軍出海捕之遇於海門縣之上幫及其未陣麾眾衝擊之所殺不可勝計生獲數百人

一云獲倭寇九十二人

得其兵器

海艘奏至詔以德有功陞本衛指揮副使其官校千二百四十七人賞綺帛五十疋銀二千五百六十九兩戰溺死者加賜錢布米仍命德欽往捕未盡倭寇遣使祭東海神曰予受命上穹為中國主惟圖又民罔敢怠逸蠢彼倭夷屢肆寇劫濱海郡縣實被其殃今命將統帥舟師揚帆海島乘機征勦以靖邊民特備牲醴用告神知德被命復往捕之倭寇皆畏懼不復出沿海遂寧

嚴淵定遠東城鄉人少喜格鬪及長勇略過人初從州縣義兵歲癸巳

太祖駐濠州遂歸附授隊長以屬張萬戶從擊泗州甲午克滁州乙未正月克和州版門砦六月護蹕渡江克采石太平溧陽溧水張萬戶薦其才授總管丙申破水陸敵砦取金陵鎮江廣德丁酉下毗陵寧國宣州甘露壘亭戌戌從上取婺州因踣諸暨自是援

龍江擣皖城潯陽策應安豐平武昌攻廬州奪樓兒張前部三十餘人賜銀椀二拔泰州舊館湖州蘇州禽張士誠吳元年冬錄其戰功陞虎賁衛副千戶從征山東沂濟等州洪武元年誥授武德將軍管軍正千戶克開封河南府陝州河北等處山砦進取薊北

遂征山西二年征陝西勲績益著三年陞徐州衛指揮僉事賜流官誥宣武將軍又二年誥授明威將軍贈其父母八年正月調綏德衛指揮僉事十四年卒命官歸其喪塋東城祖塋卹典從厚子興幼命錦衣衛優給二十一年興年十六詔從王都督臨清操練二十五年襲父職調甘州中衛署陝西都司事宣德九年卒孫旻襲調西寧衛再調潁川衛曾孫斌襲潁川衛僉事

紀斌國初預征討克取江淮楚漢及吳會累積戰勲歷官指揮丁未冬從取中原下山東數郡洪武元年

攻李景昌於汴梁克河南府從都督馮宗異分兵取陝州遂元將脫回帖木兒遂克之進兵攻潼關守將李思齊張思道棄關而遁引兵西至華州元兵皆望風奔潰旋師從宗異守汴梁八月王師克元都遂從宗異率師同取山西十月己巳至武陟遇懷慶邏騎百餘人獲之明日兵抵懷慶故元平章白鎖住等已棄城遁入澤州官軍遂入城獲將士八百人宗異乃命斌統兵守懷慶二年冬大賞定中原及守禦功賜白金文幣

劉元茂濠州定遠人驍勇善騎射歲甲午城口歸附

從克陰和二州六柳版門等寨渡江克牛渚太平漂
陽溧水授百戶丙申二月擊蠻子海牙水砦俘其舟
師三月大破方山營蹂陳兆先而降其衆遂取臺城
下京口桐汭攻延陵丁酉二月拔之敗宣州援兵乘
勝而取縣曰寧國州曰江陰去從

上親征者二取婺州以戊戌十二月擣皖城江州以辛
丑八月繼是而擣

寇於彭蠡翦殘漢於

章感呂珍於安豐殲陳

戶又覆金斗奪海陵

淮泗轉戰湖州攻姑蘇而

偽吳以滅論功賜

裏遂陞指揮僉金吾後衛

從取中原戮方齊魯汴洛放于晉冀再征秦隴縛有
顯庸洪武三年陞本衛指揮同知賜誥命授懷遠將
軍與世襲洪武中卒子貴二十年襲父職調臨洮衛
孫青宣德八年襲調鎮番衛

張恭國初預征伐累以武功拜官至指揮同知洪武
十四年從穎川侯傅友德征南下普定普安拔曲靖
克雲南府十五年克大理等處從定烏撒叛蠻及善
闡諸夷之復亂者又從取諸州縣雲南既平陞貴州
都司都指揮統兵鎮禦其地夷情陰譎叛服靡常或
不供租賦嘯聚山峒或不時糾衆劫剽居民總兵西

平侯沐英每有征討必以遣秦無不成功二十三年
冬十月普安酋容即作亂調秦討之俘殺二千餘衆
獲馬牛數千得糧四萬斛容即亡命諸蠻震懾邊境
以寧

王銘字子敬和州人歲乙未率章豫國公俞通海起
兵於無為之海子口以應

太祖銘往從之豫國公一見銘大奇之留居帳下夏六
月從攻下采石磯乘勝取太平而元中丞蠻子海牙
復以兵屯采石丙申二月豫國公與常忠武王合兵
攻之銘以驍勇裨居奇兵之列正兵方與之合銘率

諸奇兵大譟搏之其衆不能支遂破其水寨三月從
攻陳也先營於段巷拔之進克建康鎮江七月偽吳
張士誠軍薄鎮江擊走之追奔至江陰石牌而還八
月從攻常州會青軍叛去與偽吳軍合乃還軍援大
將軍徐公於牛塘丁酉三月從攻下宜興七月與偽
吳軍大戰於太湖流矢中左臂引刀出鏃復戰勇氣
彌厲豫國公勞之曰力戰而創不恤壯士壯士李陵
賢將也其麾下士裹創而戰固當顧予何人而得此
於爾哉八月從攻朱州判軍於石牌戊戌四月復從
豫國公擊通州於黃橋鵝項張榮等若有白金文綺

之賜遂從攻雙刀趙於池州之攸陽冬十有二月從
上親征婺州庚子五月偽漢陳友諒軍入太平犯龍灣
從豫國公迎擊敗之遂北至采石銘獨馳入其陣敵
攢槊刺銘傷頰而銘轉旋三周殺傷過當流血淋漓
不顧也賜文綺銀枕各一 上察銘忠謹辛丑六月
按于行伍以備禁衛佩刀劍侍左右無寒暑朝夕頃
刻不離八月從

上取江州癸卯八月偽漢軍犯南昌 上親督諸將往
討之銘被堅執銳扈從遇友諒於彭蠡湖之康郎山
聯舟酣戰湖水盡赤友諒軍敗退保保鞋山我舟敵江

面扼湖口者旬有五日友諒軍乏食出禁江口求戰
又大敗之友諒中矢死兩戰銘賈勇爭先功為多尋
分遣諸裨將撫定荆湖銘往英山縣諭沈頭陀等曰
爾主連城數十方地萬里精兵百萬大艦數千猶不
能全而一旦送死禁江口爾等保區區尋丈之險况
能久生哉今大兵四出進討偽漢遺孽爾不早歸順
尚安所逃死乎弗聽遂加兵諸壁壘悉平有功擢管
軍百戶甲辰三月從黑丁指揮德即丁往擊廬州七月
克之八月往援安豐乙巳五月從常忠武王攻下安
陸襄陽九月還攻泰州閏十月克之丙午夏四月轉

擊淮安又下其秋 上命諸將攻浙西銘從常忠武

王直趨湖州之毗山與敵兵水陸鏖戰敵兵敗北直

抵城下銘與有功為丞相張士信悉境內精兵來援

屯于舊館出我師之背忠武王簡伉健士由大全港

繞入東阡復出敵背為奇兵以分其勢且填壅溝港

絕其歸路銘在行挺戈先驅晝晝夜之力又敗其援

兵偽元帥徐義之衆于烏鎮冬十月舊館降十有一

月湖州亦下遂攻蘇州大小之戰數十丁未九月蘇

州破擒士誠師還而銘以十月分兵守禦松江洪武

元年春被 旨佐翁德也 揮守禦太倉二年二月制

授昭信校尉依舊管軍百戶四月從

揮守禦

海上遇於海門縣上幫及其未陣

擊之所殺

衆生獲數百人以獻復有白金文

之賜三年七月

泉州漳州不靖從平章廖公永忠

撫之悉定其地

四年二月都試百戶用鎗之精

與銘敵者與百戶

尤宣角三合二勝立除武畧將

太倉衛管軍副千

戶後二月召至 闕下超拜宣武將軍長淮衛指揮

僉事五年八月 詔若曰温亦東南重鎮苟非其人

豈堪付託其以長淮衛指揮僉事王銘為其衛僉事

銘拜 命以九月涖温審利害度先後而施張弛舒

慘之功威行惠流而遠近為之易視改聽嘗再奉
旨造海舟數十艘心計指授井井有條吏無所售其
奸民用不擾瑞安民周廣三等盜弄兵三魁私鬻者
衆至六百餘人殺巡檢銘選士授以方畧盡獲而誅
之乃上奏曰臣所領鎮岸大海而控島夷城池樓櫓
因陋就簡非獨不足以壯國勢卒有風潮之變抑
將何以禦之勢湏改為臣敢以聞報下以七年八月
繕城而陶甃甃之延袤三千餘丈高視舊益三之一
既崇飾雉堞改作各門層樓使宏敞鉅麗與城相稱
又每若干步為敵樓三間環城之上凡五十餘樓以

月浚濠自南門至東門以丈計之一千而羸
其深與廣皆倍於初又剏二堰閘曰南關曰堰頭為
蓄洩之限以九年十月增築外垣首起海神山尾屬
郭公山為丈二千有奇其高與闊各十有二尺由是
海水縱暴患不及城矣換廣威將軍錫以世襲

制書則十一年四月也十四年冬十月括蒼吳達三
等構亂犯平陽瑞安銘出兵捕之比延安侯唐勝宗
統大軍至則寇之就誅夷者十六七矣延安五閩月
而輯寧一方奏凱還京寔銘力之以焉十六年春銘
得告往和州改葬先公先夫人且行郡之耆庶填道

留行揚言曰吾士民賴公而老者得其養少者得其
長傷殘疲憊者得其休息奈何舍我去馬不得前銘
慰遣之則皆垂涕以別及銘還自和州男女無老稚
爭相遮迓咸欣欣然有喜色郡守長相顧曰吾屬為
天子牧民民視吾屬去來漠然不以為意王指揮職
乎軍者民於其去也戚而於其來也喜乃爾豈聲音
笑貌之所能為哉吾屬愧王指揮多矣

史氏曰凡人之才有所長者必有所短是以武能戡
亂文能附衆一人之身兼茲二美謂之全才夫其生
也豈偶然者求之往古一代曾不數人焉銘生當興

王之運方用武時從諸大將東征西討則奮其才畧
無戰不捷而功以建及天下大定蒙被寵眷臨制方
面則興廢舉墜推恩布惠而民以懷况謙恭而不伐
敬慎而無愆於戲若銘豈非才全而德鉅者哉論次
于篇一以見銘之賢非流輩之所可及一以見

聖朝將帥得人之盛度越前代云

蘇伯衡撰

皇明開國功臣錄卷二十八

定遠黃金

陳亨 蔡玉 曹崇 仵勇 陳起 費旺

高謙 養雄 陳祥 朱杲 孫琪 陳春

楊春 李信 朱真 謝恩 萬德 李通

李英 景福 張旭 吳玉 吳立 王興

韋富 吳勝 王英 張興 陸成 武英

周鶚 張彪 楊興

陳亨和州順天鄉青陽人國志作壽州人勇敢善騎射初從

太祖高皇帝渡江以征戰功授管軍百戶洪武三年陞

燕山左衛正千戶六年陞本衛指揮使再陞大寧都
司都指揮鎮守大寧號令嚴明下人畏服數從總兵
官藍玉征進野先安干毛哈刺有功陞後軍都督僉
事仍掌北平行都司事十九年三月朝京師告歸展
母韓氏夫人墓 陞辭 賜御製碑文以寵之人以
為榮三十年復來朝

上以亨有功命其長子忠為南京府軍中衛指揮使亨
仍原職加行軍都督後從軍平內難虜戰霸上乘勝
而南至白溝奮擊衝陣以疾卒追封涇
和州志國公
亨三人長即忠次輝襲指揮使次懋以功封寧陽伯

永樂中禽中允王有功進寧陽侯世襲正統中征
葉宗劉加太保孫閏

蔡玉國初從取江南克毗陵擊武康下婺州諸全策
應龍灣破安慶江州攻無錫援長興克新淦永新等
處累樹戰勲授管軍千戶丙午從伐張士誠畧太湖
降昇山舊館奪湖州吳江州丁未九月拔蘇州執張
士誠賜綵段表裏陞指揮僉事十月從御史大夫湯
和都督吳禎等討方國珍下温台慶元國珍遁入海
島諭降之十二月從取福州洪武元年正月克延平
降元叅政文殊海牙執元守臣平章陳友定先是

上遣使招友定不從誓死守城至是我師攻其西門友定堅守不動玉等併力攻之友定勢感飲藥不死遂執之械繫送京師并執其子海延平既定遂置衛以玉為延平衛指揮統兵守禦是年六月友定故將金子隆寇延平官軍出陣于城南橋以禦之玉率衆奮擊大破其衆追至沙縣之青雲寨子隆等負險拒守建寧衛指揮使沐英遣兵夾攻破之禽馮谷保南劍之境遂寧

曹崇國初從取江淮擊楚漢削平吳越累功官指揮僉事從大將征中原下齊魯浚儀河南北臨德滄通等州遂克元都徇取真定隨征山西克太原洪武元年十二月大將駐太原以介休平遙等處紅蓮溝等山寇未平乃命崇與指揮周賢王約將兵往浦北等皆平之二年二月從大將拔河中府渡河入潼關遂克鳳翔隴州鞏昌所向風靡四月馮宗異克臨洮降李思齊遣人送之大將營大將乃遣崇送思齊赴京上留思齊命崇回大將所聽調從攻慶陽張良臣出戰不利八月二十一日城破遂克之是年冬賜白金文幣明年從征沙漠至定西襲兀將擴廓帖木兒營西北取靈夏至察罕惱兒及東勝等地皆有功

許勇國初從戰伐累立武功授管軍千戶歲乙巳襄
漢阮平爰取淮東十一月克泰州丙午三月克高郵
四月克淮安濠泗八月從伐張士誠十月破昇山舊
館十一月克湖州遂圍蘇州丁未九月蘇州城破士
誠就執以功賜彩段表裏陞指揮僉事從討中原是
冬克山東沂州拔益都下濟寧等處洪武元年克棗
州三月克汴梁四月克河南府俘獲兵衆乘勝克洛
陽陝州河北衛輝廣平會師臨清取德州長蘆直沽
河西務通州八月進克元都復於古北口追元潰散
遣卒十月平章曹良臣以大將軍命提兵守通州勇

屬焉二年二月庚辰故元丞相也速來寇時大軍征
山西北平守兵數少通州城中亦僅千人也速將萬
餘騎營于白河良臣語勇等曰吾兵少不可與戰彼
衆雖多然亡國之後屢挫之兵可以計破乃密遣勇
等於沿河舟中各樹赤幟亘三十餘里鈺鼓之聲相
聞也速望之驚駭遂引迺去城中出精騎渡白河追
之至薊州不及而還十二月大賞守禦功賜文幣七
表裏三年從征沙漠敗王保保及擴廓帖木兒軍於
定西預有功

陳起臨淮人剛勇善馳射歲壬辰兵起即來附從取

九灣攻濠之定遠克滁和二州扈從渡江克牛渚姑孰溧陽蠻子海牙結砦江面丙申二月擊破之賊遁去遂破陳也先營於殷巷乘勝取南臺京口拔堅壘於廣德累功授總管丁酉攻毘陵寧國宣州下之以六月陪江陰戊戌從

上率師取婺州諸全亦下明年五月擊陳寇於龍江之石灰山自是戰同安濤潯陽繼有黃梅之捷下豫章援安豐而吳將呂珍敗走鄱陽血戰金斗先驅北寇管軍正千戶襄漢阮定規取海陵乙巳冬克之丙午克高郵以三月下淮安以四月奪湖州以十一月

西俱定進圍姑蘇丁未九月攻破其城遂從覆無錫以還功賞綵段表裏陞指揮僉事繼以討浙東取中原勲績有加進指揮同知府軍衛賜誥命授懷遠將軍與世襲洪武中卒子孫襲調安東中護衛同知費旺鳳陽人國初從取江南削平楚漢淮東浙西懋昭戰勲歷官指揮僉事繼取中原破齊魯諸州汴梁河洛燕冀等處隨征山西克太原洪武二年二月從大將克河中府中潼關拔鳳翔隴州鞏昌臨洮平涼涇州六月進取慶陽先是慶陽守將張良臣既降至是復叛大將怒遂率諸將攻之恐其黨與相扇為聲

援乃元遣兵抄其出入之路遣旺將精兵守涇州諸軍進攻四面圍其城良臣開門拒敵屢戰而劔久之援絕食盡力不能支而計無所出八月癸未城破良臣被誅旺以功賜文幣七表五年復征沙漠敗擴廓帖木兒兵於定西追王保保皆有功進懷遠將軍指揮同知

高謙集縣下閭村人至正

同弟諒於東口歸附

上察其智勇每征俾居前部

有功扈從渡江拔水

石太平水陸敵砦金陵鎮

下常宣江陰從楊璟

取婺州克諸暨敗偽漢陳

於龍灣破皖城潯陽

癸卯之春吳將呂珍寇安豐從諸將援之擊珍敗走

因攻廬州時偽漢以重兵圍困洪都七月從

上率師親征遇於鄱陽湖殊死戰友諒移師欲奔後截

擊之於禁江口友諒竟敗死錄功授廣武衛百戶自

是平武昌定荆湖海陵高郵舊館湖州克蘇州征浙

東取中原在在著勲累陞至指揮同知洪武十一年

調杭州衛十二年調紹興衛十七年召回京調雲南

右衛謙奏家屬衆盛非祿養所能給願分撥回鄉

上可之賜水陽田地一千七百畝贖其家子孫世襲雲

南右衛指揮同知

養雄壽春人父欽隱約不仕當元季喪亂鄉里強暴
侵掠人弗寧居於是豪傑並起雄乃即戎自是從
王師取金壇下常州克湖之舊館遂攻蘇州滅偽吳
擊寧波入閩取漳泉補葉陳二姓海寇於蘭秀山還
攻平陽太原追擴廓帖木兒克桃花蟻尖諸寨調守
西安征西涼甘肅等處又從征沙漠征雲南復征金
山獲元將納哈出征胡至哈刺哈河執其王遂追錦
川王獲馬足輜重又從征大小廣西底倭等皆勦
寇獲孳畜無筭還京論功自隊長為百戶自百戶為
千戶自千戶乃擢長沙護衛指揮僉事領士卒復征

雲南屯操越州尋授明威將軍征羅雄州以前職改
任雲南中衛率兵攻破越州龍海阿資等蠻又改任
瀾滄調安慶調瀋陽後年老得致仕妻宋氏封恭人
子四人曰誠早卒曰政襲瀋陽衛指揮以功能擢江
西都司署都指揮僉事位方鎮威望甚著曰能曰賢
皆以孝友稱

陳祥定遠積善鄉人至正甲午本縣歸附從克大柵
版門等砦護 躡渡江拔牛渚磯取太平破中丞水
砦南臺鎮江攻下延陵寧國宣州江陰望亭皆預有
功由百夫長授總管從取婺州諸暨策應龍江擣同

安潯陽偽都黃梅廣濟援壽春平鄂州廬州海陵舊
館雲川蘇州浙東遂征中原洪武元年陞寧國衛千
戶二年從克鳳翔鞏昌臨洮平涼慶陽加管軍正千
戶十四年從征南副將軍永昌侯藍玉西平侯沐英
等克普定普安曲靖入雲南府平大理從勦烏撒再
定善闡及取鶴慶麗江隨張都督攻諸山砦勲績益
著十七年陞杭州右衛指揮僉事二十年金瘡痛發
先是祥在征數中流矢傷臂脇至是醫弗瘳而卒子
瑛襲父職三十年調金鄉衛孫晟襲永樂七年調威
海衛曾孫良襲威海衛僉事

朱杲國初預征江淮楚漢吳越屢策戰功歷官指揮
從取中原克山東河南及大都路山西太原等處洪
武二年從大將克河中府鳳翔隴州鞏昌平涼涇州
六月進取慶陽先是慶陽守將張良臣以其兄思道
為擴廓帖木兒所執會湯和部將謝三遣人招之遂
以城降既而悔之復叛大將怒遂率諸將取之命杲
等諸衛環城列營晝夜力攻初良臣之復叛也自以
其城高險下有井泉可據以守其兵又精悍養子七
人皆善戰又倚其兄與王保保為聲援賀宗哲等為
羽翼平章姚暉等為爪牙故欲拒守以圖大功及王

師因城下良臣不得逞數出戰又不利遣人赴寧夏
求援皆被獲內外音問不通而糧餉乏絕至煮人汁
凡泥嚙之姚暉等知事不濟爭獻門納師八月癸未
杲等從大將勒兵入北門良臣父子皆投井中杲引
出斬之復誅其黨數百人大將遣人赴京獻捷留兵
戍守慶陽既平杲以功賜白金文幣

孫琪國初攻取江南戰楚漢淮東浙西以功任指揮
隨征中原破山東河南北郡縣克燕冀太原法武二
年從大將發太原取河中渡河入關西擊鳳翔隴州
鞏昌平涼涇州所至克捷六月進取慶陽從諸將環

而攻之八月破其城慶陽既平大將率師至平涼將
還京師以平涼重地必擇人戍守乃以琪與指揮朱
佑統兵守之是時兵爭未戢王保保賀宗哲及攝廓
帖木兒等窺伺無虛日琪等協力禦防卒保無虞是
年冬十二月大賞守禦功賜白金文幣三年從擊保
保兵於定西追攝廓帖木兒西北取靈夏等地皆預
有勞

陳春壽州下蔡人初屬左總管為頭目歲甲午改隸
張天祐七月從

太祖克滁州乙未閏正月克和州充百戶六月護蹕渡

江拔米石太平七月取溧水八月取溧陽以智勇聞
丙申二月破中丞水砦二月覆陳也先營克南臺鎮
江以耿炳文薦陞千戶尋下廣德丁酉三月克長興
附炳文守禦陞萬戶長興當姑蘇水路要衝偽吳屢
以兵來侵軼皆擊敗之乙巳更制編伍除管軍百戶
丙午參隨徐丞相伐張士誠取湖州吳江州直擣蘇
州軍于婁門窮晝夜以攻吳元年九月八日城破士
誠就禽十月奪上虞餘姚明州十二月隨湯大光航
海取福州洪武元年正月克延平執陳友定仍回福
州二月克興化泉州等處三月調守福州八月征進
福寧洪江克寧德抵吳全浦山寨破賊巢生禽李七
使等十八人梟以示衆二年夏授昭信校尉三年五
月出海捕倭至福清海洋偵有賊船數百艘即襲破
其衆生禽二十一人斬首二級六月克光澤縣捕獲
賊首陳同至興化瀨溪浦殺賊伯燕不花之衆不可
勝計縛其首惡一名至楓臺縣陳同之黨來寇擊敗
之生禽一十四人遂克惠安四年春賞功賜綵段四
表裏與世襲六月調羽林右衛七月陞陳州衛副千
戶誥授武畧將軍十一年正月進武德將軍世襲千
戶二十六年召赴京陞羽林右衛指揮僉事明年十

月六日陞僉右軍都督府事有

旨光祿寺卿張弼會同都督沐晟徐增壽等官本府待宴明日入謝 賜良馬一疋金織衣二襲尋加驃騎將軍誥封三代二十八年三月命往河南彰德等府撫安遷民提督屯種三十一年正月同魏國公往山東登萊籍民丁為軍就於沿海地方開設大嵩等衛所衙門脩治城池永樂元年復往直隸衛所巡視城池軍馬因墜馬傷右足

朝廷遣醫視之三年以疾致仕七年卒

賜祭葬子

祥洪武二十七年襲羽林右衛僉事孫宣曾孫鼎任

長陵衛僉事

楊春國初預取江南力攻楚漢轉戰兩淮東擊吳會所向有功累官指揮僉事吳元年十月從伐中原十一月克沂州降王宣破益都下嶧莒十二月克濟南遂統兵守禦洪武元年閏七月庚子元降將喬僉院叛于濟南喬僉院者福建解象官初航海至山東吳元年十二月大將軍駐師濟南因來降至是復作亂春與指揮陳勝率師討平之斬首三千餘級是年冬賞征守功賜白金文幣

李信定遠劉柵村人歲乙未和州歸附是年六月朔

從吳萬戶護 躡渡江克采石太平溧水溧陽丙申
三月克南臺鎮江丁酉從湯同僉克復常州選充前
部先鋒隨守禦甲辰克廬州乙巳從湯平章克永新
克總旗丙午八月從湯平章攻取湖州舊館吳元年
克蘇州湯大夫選攝百戶管軍十月從征慶元等處
城池十二月克福州洪武元年正月克延平循海旋
師收捕蘭秀山葉陳二姓海寇叅隨湯大夫迤北征
進取潭州潞州平陽絳州汾州二年克陝西鳳翔隴
州平涼涇州慶陽六盤等處營寨本衛指揮同知謝
某秦信勇略兼資宜授職任除常州衛管軍百戶十

二月誥授昭信校尉三年正月調太原守禦六月調
守潞州陞太原衛管軍副千戶四年三月賜誥階武
畧將軍是月開設潞州衛改潞州衛千戶五年征進
和祿九年三月從本衛李指揮統軍馬渡黃河至四
月二日與伯顏帖木兒大戰克之獲馬一百七疋橐
駝十五頭俘其為官及家屬若干人以功賜鈔一十
一年二月進武毅將軍誥與世襲九月陞濟州衛
指揮僉事守禦北京亦十八年三月授流官誥明威
將軍二十年三月征迤北金山一迷河等處獲虜
功二十二年赴京自陳年老征傷乞致仕

上俞之二十五年召至京特陞遼東都司都指揮使二十
十年九月卒于官子彬善騎射二十二年襲父職二
十四年從穎國公征朵顏六月至鴉山追阿札失里
回次洮兒河獲人口馬足數多七月抵金安山復隨
征黑嶺寒山至磨鎌海子打蘭尖山追扎都遂征黑
松林之北野人所居熊皮山追達達兀刺罕獲馬五
十二疋明年同劉都叔昇等官於宣府興和雲州大興
保安隆慶懷來等處踏量城基兼巡視宣府城池倉
廩二十七年三月統領官軍脩築宣府及德勝口城
八月修補德勝等關口二十八年三月總率北平都

司燕山左等衛官軍脩築萬全懷來二城二十九年
北邊有警領本衛軍出口征哨於泥河營調領山海
等衛官軍哨至驢駒曲口海子哈刺黑松林等處還
於應昌聽調至秋回衛後以從靖難功陞都指揮同
知都督僉事封豐城侯鎮守江西甘肅陝西移鎮交
趾卒追封茂國公孫賢曾孫勇玄孫璽世襲豐城侯
爵

朱真濠之定遠人宗東城鄉至正乙未和州歸附護
躍渡江拔采石取太平攻溧陽破壘子海牙水寨克
金陵鎮江廣德攻下毗陵江陰從

上取婺州自是戰龍灣同安潯陽壽春彭蠡無役不從
甲辰武昌既平從取熊天瑞於贛州乙巳正月克之
以功陞贛州衛管軍百戶洪武改元從征廣東克英
德清遠晉江連州肇慶等郡縣進拔德慶會取廣州
明年調征中原四年陞西安衛中所正千戶從伐西
蜀五年征沙漠八年討禽叛賊復征沙漠陞燕山衛
指揮僉事禦寇有功進本衛同知一十四年致仕未
幾卒子昱襲父職三十二年卒於官孫勝襲

謝恩定遠人歲甲午本縣歸附從克滁州乙未春克
板州若驅青山寇兵護蹕渡江拔牛渚姑孰水陸敵

若建康京口桐汭圍晉陵而攻取之丁酉四月克寧
國縣宣州其功獨多授管軍百戶戊戌從下金華己
亥奪諸暨又攻皖城擣江州以辛丑援壽春糜鄱湖
以癸卯平鄂州以甲辰繼取合肥海陵高郵兩淮風
靡東覆舊館口兵興破姑蘇而殲偽吳乃征中原克沂
州益都莒州濟南東昌勲績有加陞管軍正千戶洪
武元年取開封河南從入燕冀二年戮力而擊三秦
三年征沙漠八年錄其前後戰功陞西安衛指揮僉
事與世襲賜誥授明威將軍二十六年卒子宗襲調
鎮虜衛永樂十八年卒孫貴襲

萬德國初從征討以戰功授官指揮洪武四年正月
上以偽夏明昇竊據巴蜀阻外聲教命湯和廖永忠等
率京衛荆湘舟師由瞿塘趨重慶以討之德為部將
是年夏從永忠入舊夔府偽夏平章鄒興副樞飛天
張出兵拒戰擊敗之禽其元帥龔興殺溺死者甚衆
進攻瞿塘關焚其飛橋斷其橫江鐵索大破其衆鄒
興中火箭死禽斬溺死不可勝計飛天張等遁去遂
入夔州乘勝抵重慶明昇與右丞劉仁等大懼仁勸
昇奔成都昇毋彭氏泣止之遣使納款乞降既而湯
和亦至重慶會永忠陳兵朝天門外明昇面縛銜璧

與毋彭氏及劉仁等奉表詣軍門降受璧永忠解
縛承制撫慰遂遣德送昇等并降表于京師秋七
月乙丑德送昇等至京初

上聞大軍下蜀命中書集六部太常翰林國學定議受
降等禮省部言宋太祖乾德三年蜀主孟昶降昶及
子弟偽官李昊等三十二人至闕下皆素服紗帽進
待罪表俯伏于地通事舍人掖昶起昶躬聽令宣制
釋罪昶等再拜三呼萬歲闕門使承旨湯昶等襲衣
冠帶昶等再拜跪受各就次易服然後入見永宗元
殿閤門使昶等入起居蹈舞稱謝宣徽使承旨宣

昶陞殿昶等再拜陞宣徽使承旨宣示至御座前鞠躬太祖親撫問之昶遂位與其官屬皆跪舞再拜三呼萬歲出中書門下率百僚稱賀今擬明昇朝見禮上御奉天門昇等於午門外跪進待罪表待儀使捧表入宣表官宣讀訖承制官出傳制昇等百俯伏于地侍儀舍人掖昇起其官屬皆起跪聽宣制釋罪昇等五拜三呼萬歲承制官傳制賜衣服冠帶侍儀舍人引昇入丹墀中四拜出丞相率文武百官行賀禮上曰明昇與孟昶不同昶專治國政所為奢縱昇年幼事由臣下宜免其叩頭伏地上表請罪之禮是日昇

及其官屬朝見百官稱賀制授昇為歸義侯賜冠帶衣服及居第于京師冬十二月賞平蜀功賜德白金綵段

李通定遠人歲甲午歸附克滁和於三汭河土橋有功護蹕渡江拔牛渚太平剡中丞水砦克嚴巷乘勝取金陵鎮江丹陽攻下桐汭毗陵宣州江陰營于甘露捷于望亭馳戰于婺衢奮擊龍江破敵于同安北門長驅九江因攻湖廣而下洪都壽春之援寔扈車駕以往擊賊鄱湖以死自誓繼是而有武昌之捷銳鋒所向合肥以下海安以克吳興以定姑蘇以平

北征青兗浚儀河洛汝南自陝以西益樹勞績歷百
戶總管千戶擢指揮僉事陞南陽衛指揮同知與世
襲誥授明威將軍洪武十三年卒子彝襲父職卒孫
懋襲調寧夏中衛

李英國初預征戰策武功歷官指揮洪武四年正月
上以爲夏竊據巴蜀有阻聲教乃親祀上下神祇告伐
明昇既命湯和等取重慶復命穎川侯傅友德爲征
虜前將軍率河南陝西步騎由秦隴取成都以英爲
部將受命從友德馳至陝揚言出金牛乃潛趨陳倉
緣山谷以行直向階州蜀守時丁世真出兵迎敵擊

敗之禽其將雙刀王四月四日遂克階州進取文州
丁寇復以兵據險復攻破之文州既克遂度青州果
陽白水江蜀人望風驚遁乘勝克綿州再拔漢州敗
其守將向大亨及蜀丞相戴壽等兵進圍成都壽與
大亨出城拒戰以象載甲士列于陣前時英居前鋒
以弓矢火器衝之象中矢却走壽兵躡藉死者甚衆
會湯和遣人報重慶之捷壽等亦得其家書聞重慶
已降而室家皆完遂無鬪志乃籍府庫倉廩遣其子
詣軍門納款友德許之翌日壽等率其屬降遂克成
都得士馬三萬自是從克崇慶保寧蜀地悉平冬十

二月賞平蜀將士英以功賜白金綵段

景福濠州人初以武藝精熟充州縣義兵長歲丁酉太祖保有江左福來附命攻寧國縣敗宣州援兵即授百戶是年六月下江陰明年攻湖州從取婺州己亥克諸全三衢庚子陳友諒寇龍江從諸將擊敗之克復太平辛丑破敵同安攻湖廣招諭江右康祝變亂尋戡靖之癸卯策應安豐甲辰武昌平陞千戶自是取金斗衝通州海安大敗吳兵淮東既定乃拔昇山舊館慶平江以殲偽王北征齊魯汴洛收大都深入沙漠轉戰晉秦等地錄其勲勞授會州衛指揮同知

後以功陞右軍都督府都督僉事卒子貴襲會州衛指揮使

張旭廬州巢縣人勇毅過人歲乙未五月于巢歸附六月護蹕渡江拔采石取太平攻蕪湖丙申破蠻子海牙舟師克南臺鎮江丹陽丁酉攻下毗陵宣州江陰戊戌從踏金華回援池州庚子五月偽漢陳友諒突犯龍濟從擊敗之而太平以復率兵從

上親征友諒至安慶隨徐大將去其水寨大破之遂克其北門徑擣潯陽友諒奔武昌癸卯以壽春因攻廬州是時友諒以重兵圍洪都復從上親征友諒解

圍遇王師於鄱陽之康郎山旭從諸將擊之殊死戰
友諒兵衄欲遁復邀擊之於禁江口友諒竟敗死以
屢功進百戶又進千戶尋以桂東江西等處收獲賊
首進僉衡州衛指揮使司事洪武三十五年還鄉卒
子賢孫清曾孫俸世襲衡州衛僉事

吳玉定遠人世家大橫山之盤塘業農玉生有膽畧
遭元季兵亂并里動勦乃棄生業習武教會邑人湯
萬戶集民兵應

太祖玉遂以甲午春從軍隸萬戶麾下萬戶察其智勇
表為千夫長從取滁州由塔子山進兵西者不能禦

遂克其城分兵破張家堡驢牌寨乙未二月克和
州新河六月渡江拔采石徑取太平八月攻下溧陽
是時蠻子海牙擁樓船結砦江面與陳桷先水陸為
犄角以窺太平丙申二月從檣蠻子砦俘其舟師三
月剗桷先營乘勝克金陵東下取鎮江以屢功授神
武衛百戶鎮江守禦庚子閏五月調援龍灣辛丑從
上聲討潯陽偽漢出奔于鄂丙午正月朔吳人以巨艦
數百艘乘夜寇鎮江玉從擊敗之迨至江陰境而還
是年秋東伐湖州十一月取之明年從滅吳受上賞
洪武四年命將征雲南玉從有功陞懷遠衛千戶八

年又以征交趾功陞南陽衛指揮僉事賜誥命與世襲授明威將軍十五年卒子勝襲羽林衛指揮僉事二十年調潁川衛仍前職二十一年滿雷州衛左所副千戶孫英襲千戶

吳立國初為斷事官洪武四年春故元平章劉益以遼東之地來降

朝廷遣立往宣詔置遼東衛於得利麻城以益為指揮同知未幾故元平章洪保保馬彥翬共謀殺益故元右丞張良佐左丞房嵩率部下擒彥翬殺之保保走納哈出營遼東之衆因推良佐與嵩權衛事六月良

佐以其事來聞仍上其事於中書省備言本衛地方遼遠僻處海隅肘腋之間皆為敵境其元平章高家奴固守遼陽山寨知院哈剌張屯駐瀋陽古城開元則有元相不花之兵而金山則有太尉納哈出之衆彼此相依互為聲援今洪保保逃往其營必有構兵之釁乞留斷事吳立鎮撫軍民右丞相汪廣洋以聞上可之命立為遼東衛指揮僉事未幾置定遼都衛總轄各衛以立為蓋州衛指揮八年納哈出入寇都指揮馬雲命立嚴守寧至土壁勿與戰及納哈出至見城中備禦嚴不敢攻乃越蓋州城徑趨金州復

為金州守將所欺約吟出勢大沮慮援兵且至引兵退走以蓋州有備不致經其劫乃屯城南十里外沿柞河遁歸都指揮葉旺預伏沿河自連雲島以北十餘里為水城陷奔設伏以待之立亦嚴兵以候虜至立與旺俟其過城南砲發伏起兩山旌旗蔽空鼓聲雷動矢石雨下納哈出倉皇北奔趨連雲島遇水城馬不能前皆陷入窰中遂大潰立與旺乘勝追之踰將軍山畢栗河直至猪兒峪獲廿六士馬無算納哈出僅以身免

王興棗州定遠人本田家子迫於江

孔從

太祖義師歲甲午克大柳驢牌等寨乙未取和陽捷于新河渡江拔牛渚姑孰溧陽丙申破中丞水寨克殷巷遂取南臺南徐丹陽金壇而攻延陵功甚著丁酉奪宣州江除甘露擊無錫自是從下寶婺援秋浦龍江戰皖城三陽安置平鄂州勲績有加授驍騎衛管軍百戶圍合肥挫樓張銳鋒規取海安泰州蹙舊館降湖州戮力吳門以擒偽主爰取中原青濟汴洛燕晉等處洪武三年征沙漠破賊定西陞龍虎衛正千戶五年調慶陽衛後所以數征虜及討叛賊八年陞秦州衛指揮僉事十一年誥授世襲階明威將軍二

十一年卒子綽襲彭城衛指揮僉事三十二年陞本
衛同知明年白溝河有功陞本衛指揮使三十四年
克夾河等處陞僉都指揮事三十五年陞雲南都指
揮同知孫剛襲彭城衛指揮使永樂中調保安右衛
曾孫琦襲保安右衛指揮使

韋富國初以征戰積武功洪武四年分置遼東諸衛
以富為金州衛指揮僉事八年納哈出入寇蓋州衛
指揮吳立等知其將至嚴兵城守堅壁以待及納哈
出至見城中備禦嚴不敢攻乃越蓋州城徑趨金州
時金州城垣未完軍士寡少富聞虜至與本衛指揮

王勝督勵士卒分守諸城門選精銳登城以禦之納
哈出裨將乃刺吾自恃其驍勇率數百騎徑至城下
挑戰城上發弩射之乃刺吾被傷悶絕遂獲之虜執
大沮富等復縱兵出擊納哈出不利慮援兵且至引
兵退走以蓋州有備不經其城乃由城南十里外沿
柞河遁歸是時馬雲葉二為遼東都指揮威望甚著
富與勝協力誓守屏衛疆圉俱以智勇聞

兵勝臨淮入國初從取江南定楚漢淮浙東征西討
北伐中原累立戰功由總旗除太原衛千戶陞登州
衛指揮僉事十傑襲陞豹韜衛指揮使調寧夏中護

衛再陞陝西都指揮同知

一土英廬州合肥人洪武中屢立戰功陞後軍都督僉
一事永樂初僉掌陝西都司事安靖不擾勤於訓練卒

賜葬祭

國志

張興字彥文臨淮人少傑魁穎異父彬善奇之訓誨
篤至及長遭時兵亂歲壬寅歸

太祖以材武深被知遇從征累立戰功授杭州衛千戶
一推廣陵翼元帥官制行改濠梁右衛指揮調永寧衛
一午後以子信授勳爵追封隆平侯妻詹氏封太夫人
一子三人長即信初襲並是指揮轉平越衛陞北京

指揮靖難有功封隆平侯次毅鎮守定州都指揮次

忠江陰衛指揮

陸成國初以戰功由百戶歷官指揮丁未九月姑蘇
既平從征中原克齊魯諸郡縣洪武元年克東昌汴
梁河之南北進取大都放于太原二年克鹿臺河中
鳳翔隴州鞏昌平涼涇州六月從大將攻圍慶陽元
守將張良臣以兵出戰擊敗之先是良臣以慶陽降
既而復叛大將怒其欺肆故至是帥將督兵攻之甚
急良臣靖援於寧夏復為我師所獲內外音問不通
良臣計無所出而糧餉乏絕至煮人汁丸泥嚙之其

部下知事不濟爭獻門納師八月癸未成從大將入
城良臣父子皆伏誅大將遂遣成赴京獻捷是年冬
賞平西將士成以功賜白金文幣

武英定遠人驍勇精射技歲甲午橫山歸附從徐達
取滁州乙未取和州授千夫長渡江取采石太平溧
水溧陽丙申破中丞水寨及也先營克南臺鎮江金
壇廣德達薦其才授萬戶丁酉下毗陵拔寧國縣宣
州奪馬馱沙戍戍復宜興下婺州己亥克諸暨以正
月攻紹興以二月撥衢州以九月庚子五月擊陳寇
於龍江褫其軍明年擣同安討賊江州壬寅更制編

伍除鷹揚衛管軍百戶癸卯援安豐圍廬州繼有鄱
陽之戰武昌之捷自是取中興救安吉征進浙西舊
館湖州吳江蘇州在在著勲吳元年以本衛郭指揮
言英功浮於職陞天長衛管軍千戶從征中原克沂
濟汴洛衛輝廣平通州大都太原鳳翔秦隴鞏昌平
涼慶陽以及定西而勞績益懋洪武十年十二月復
以收捕賊衆陞南寧衛指揮僉事賜誥授明威將軍
十二年卒子仁襲父職孫榮襲調山丹衛曾孫寧襲
山丹衛僉事

周鶚國初驍將從征伐累立武功洪武四年秋七月

朝廷以遼東新附人心未安故元將納哈出等又數為
邊患置定遼都衛以馬雲葉旺等為都衛指揮使等
官又置諸屬衛以鶚為定遼前衛指揮使事佐雲等
守禦邊疆八年納哈出入寇雲知其將至預戒蓋州
衛指揮吳立等嚴兵城守堅壁勿戰及納哈出至見
蓋州備禦嚴不敢攻徑趨金州復為金州守將常富
等射殺其裨將乃剌吾虜勢大沮引兵退走不敢經
蓋州城乃由城南十里外沿柞河道歸葉旺策其將
退預與鶚等引兵移柞河自連雲島至窟駝塞十餘
里緣河壘水為四牆以水淋之經宿皆凝涇隱然如城

藏釘板於沙中設陷馬奔於平地伏兵以待之命老
弱卷旗登兩山間戒以聞砲即豎旗令鶚等嚴兵以
候四顧寂無人已而虜兵至旺與鶚俟其過城南砲
發伏兵四起兩山旌旗蔽空鼓聲雷動矢石雨下納
哈出倉皇北奔趨連雲島遇冰城馬不能前皆陷入
窰中遂大潰雲於城中亦出兵追擊至將軍山畢粟
河斬戮虜人馬及凍死者甚衆旺與鶚復乘勝逐至
豬兒峪獲其士馬無算納哈出僅以身免鶚後陞指
揮使

張彪國初從征江左取太平連破敵砦克金陵鎮江

丹陽廣德等處歷著戰勲丙申七月諸將奉

上為吳國公置諸司設官置左右前後中五翼元帥府以處與華雲龍唐勝宗陸仲亨鄧愈陳兆先王玉陳本等為元帥統兵征討自是攻取常州宣州江陰常熟及江南諸郡縣處多預有功

揚興巢縣柘臯人初事雙刀趙為萬戶將兵屯黃墩及守安慶以智勇聞歲庚子龍江歸附從左元帥辛丑破安慶擣江州偽都癸卯三月援安豐四月攻廬州七月奮擊偽漢于鄱陽敗其軍截戰湖口竟殲友諒明年克武昌從常總兵取贛州圍城力攻乙巳正

月降熊天瑞陞鷹揚衛百戶從克襄陽淮東泰州丙午八月伐浙西十一月下湖州丁未九月攻拔蘇州遂滅吳論功賜綵段表裏洪武元年進千戶征中原有功陞飛熊衛指揮僉事誥授明威將軍與世襲八年調貴州衛十年秋統領官軍討平西叛蠻克郎八保及三千八萬向家等砦招降土官王萬全等禽賊獲馬數多受上賞後屢平蠻寇孫芳任貴州衛指揮使

Blank columns with faint vertical lines, likely a table or ledger.

Dark, heavily inked or scribbled area, possibly a large character or a redaction.

Vertical columns of faint, illegible text, possibly bleed-through from the reverse side of the page.

